

आकाशवाणी

खबरां ---

1. केंद्री सहकारिता ते गृह मंत्री अमित शाह होरें आखेआ ऐ जे पिछले 10एं बरें च भारत च सहकारिता दे खेत्तर च क्रांतिकारी बदलाव आया ऐ जेदे नै ग्रामीण अर्थ बवस्था गी निगगर मजबूती थोआ करदी ऐ।
2. जरनैली शिडकें ते ट्रांसपोर्ट सरबन्धी केंद्री मंत्री नितिन गडकरी होरें आखेआ ऐ जे पूर्वोत्तर राज्यें ते सरहदी इलाकें सने जरनैली शिडकें दी बेहतरी पर औंदी 2 बरें दौरान 10 लक्ख करोड़ रपे दी रकम खर्च कीती जाग।
3. युवा सेवाएं ते खेड मंत्री मनसुख मांडविया होरें नौजवानें अगगे अपील कीती ऐ जे ओहू विकसित भारत दे निर्माण लेई बाबा साहेब भीम राव अम्बेडकर हुंदे सिद्धांतें थमां प्रेरणा हासल करन।
4. कल अम्बेडकर जयंती मनाने लेई मुख्य भरै च तैयारियां मुकम्मल। संसद भवन परिसर च विशेष श्रद्धांजलि समारोह आयोजित कीता जाग। प्रधानमंत्री होर हिसार ते अयोध्या बश्कार ब्हाई सेवा दी शुरूआत करडन।
5. उत्तर भारत दे केइएँ राज्यें समेत जम्मू-कश्मीर च बी बैसाखी दा ध्यार मनाया गेआ। अज्ज गै जलियांवाला बाग दे शहीदें गी चेत्ता करदे होई उनेंगी श्रद्धांजलि भेंट कीती गेई।
6. पंजाब दे फिरोजपुर च राज्य पुलिस दी खूफिया शाखा नै 2 जनें गी आर.डी.एक्स समेत गिरफ्तार कीता ऐ।

7. आई.पी.एल दे पेहले मैच च रायल चैलेंजर्स बेंगलुरु नै राजस्थान रायल्स गी 9 विकेटें कन्नै हराई दित्ता ऐ, दुआ मैच हुनै कोला किश चिर मगरा दिल्ली कैपिटल्स ते मुम्बई इंडियन्स बश्कार खेड्डेआ जाग।

<><><><><><>

Shah Bhopal

केंद्री गृह ते सहकारिता मंत्री अमित शाह होरें मजूदा सरकार आसेआ सहकारिता मंत्रालय दी स्थापना दे बाद सहकारिता क्षेत्र च क्रांतिकारी बदलावें दी सिफत कीती ऐ। मध्य प्रदेश दे भोपाल च राज्य सतह दे सहकारिता सम्मेलन गी संबोधित करदे होई गृह मंत्री होरें दस्सेआ जे सरकार नै किस चाल्ली देश दे इतिहास च पैहली बारी ग्रामीण विकास, राईबाई ते पशुपालन दे कम्में गी इक दुए कन्नै जोड़ियै उंदा एकीकरण कीता ऐ। शाह होरें सहकारी नियमें च मयार तैय करने च केंद्र सरकार दी भूमिका पर लो पाई जेदे च सब्बनं राज्यों आदर्श अपनियमें गी अपनाया ते उंदे मताबक सहकारिता क्षेत्र च सदा थमां मता बदलाव ते सुधार आंदा। उनें गलाया जे इस क्षेत्र च एल्लै नमीं जान भरोची गेदी ऐ ते सहकारी बैंक हून होरनें बैंक आंगर विस्तार करै करदे न ते ओ शङ्गे कृषि देआरें तगर गै महदूद नेई न। सहकारिता मंत्री होरें प्राथमिक कृषि दोआर समितिएं दी भूमिका पर लो पांदे होई आखेआ जे इस चाल्ली दियां समितियां हून 20 कोला मते राज्यों च शानदार कम्म करै करदियां न। इस मौके मध्य प्रदेश दुध संघ ते राश्ट्री डेयरी विकास बोर्ड बश्कार इक समझौते पर दस्तखत कीते गे जेदे तैहत राज्य च दुध सहकारी समितिएं दी गिनतरी 6 ज्हार कोला बधाइयै 9 ज्हार करने दी योजना ऐ। सम्मेलन दी अध्यक्षता मध्य प्रदेश दे मुख्मन्त्री डॉ. मोहन यादव होरें कीती।

<><><><><><>

Gadkari

जरनैली शिड़कें ते ट्रांसपोर्ट मैहकमे दे मंत्री नितिन गडकरी होरें आखेआ ऐ जे सरकार पूर्वोत्तर ते बन्ने कन्नै लगदे इलाकें च अगले 2 बरें च जरनैली शिड़कें गी निगगर बनाने पर 10 लक्ख करोड़ रपे खर्च करोग। इक समाचार एजेंसी कन्नै इक चेचे इंटरव्यू च गडकरी होरें आखेआ जे सरकार मुख भरै च शिड़क ढांचें गी मजबूत बनांदे होई बन्ने कन्नै इलाके तोड़ी शिड़क राबते गी निगगर बनाने बक्खी चेचा ध्यान देआ करदी ऐ जेड़ा देश दी सुरक्षा ते सामरिक महत्वै कन्नै बड़ा जरूरी ऐ। उनें आखेआ जे विकसित भारत लेई इनें इलाकें दा आर्थिक विकास बी बड़ा जरूरी ऐ।

<><><><><><>

Bihar-Mandaviya

युवा कार्यक्रम ते खेल मंत्री डॉ. मनसुख मांडविया होरें युवाएं गी अपील कीती ऐ जे ओहू विकसित भारत दे निर्माण च योगदान देने आस्तै डॉ. भीमराव अम्बेडकर हुंदी समानता, न्याय ते भाईचारे दे सिद्धांतें थमां प्रेरणा लैन। डॉ. मांडविया पटना दे ऐतिहासिक गांधी मैदान च मेरा भारत थमां सरबंध्यत युवाएं ते स्वयंसेवकें गी संबोधित करा रदे हे। इस मौके पर उनें युवा कार्यक्रम ते खेल मंत्रालय आसेआ आयोजित जय भीम जात्तरा गी झंडी दस्सियै रवाना कीता। उनें आखेआ जे देश दे युवाएं गी भारती संविधान दी भावना दा सम्मान ते अनुपालन करना लोड़चदा ऐ। डॉ. मांडविया होरें युवाएं गी अपील कीती जे ओहू पंच प्रण दा पालन करन जिंदा उद्धोष प्रधानमंत्री नरेंद्र मोदी होरें लाल किले दी प्राचीर थमां कीता हा। उनें आखेआ जे प्रण विकसित भारत दा मार्ग प्रशस्त करदे ना। केंद्री मंत्री होरें आखेआ जे एकता कन्नै अगो बद्धे होई असेंगी अपनी परम्पराएं पर गर्व मसूस करने दी लोड़ ऐ। उनें गलाया जे कर्तव्य ते जिम्मेदारी दी भावना कन्नै भारतीय नागरिकें गी राष्ट्रप्रथम दी धारणा पर ध्यान केंद्रित करना चाइदा ऐ। मांडविया होरें आखेआ जे प्रधानमंत्री नरेंद्र मोदी होरें 1 लक्ख युवा नेता विकसित करने दा लक्ष्य रक्खे दा ऐ ते एहदे लेई मेरा भारत अभियान शुरू कीते दा ऐ जेदे च हूनै तगर 1 करोड़ 75 लक्ख युवा इस अभियान कन्नै जुड़ी गेदे ना।

<><><><><><>

Ambdekar jayanti

भारतीय संविधान दे निर्माता बाबा साहेब भीमराव अम्बेडकर हुंदी 135मीं जयंती दे मौके पर कल नमीं दिल्ली च संसद भवन दे परिसर च स्थित प्रेरणा स्थल पर इक विशेष कार्यक्रम आयोजित कीता जाग। कार्यक्रम दी शुरूआत बडुलै राश्ट्रपति द्रौपदी मुर्मू, उपराश्ट्रपति जगदीप धनखड़, प्रधानमंत्री नरेंद्र मोदी, लोकसभा अध्यक्ष ओम बिरला, कई मंत्री, सांसद ते होरनें लोकें आसेआ बाबा साहेब अम्बेडकर होरें गी पुष्पांजलि भेंट करने कन्नै होग। श्रद्धांजलि दे बाद एहू कार्यक्रम दपैहरी 12 बजे तोड़ी आम जनता लेई बी जारी रौहग जिस दौरान कोई बी जाइयै उनेंगी अपनी श्रद्धांजलि देई सकदा ऐ। तोआई, दिल्ली दी मुख्मन्त्री रेखा गुप्ता होरें जानकारी दित्ती ऐ जे दिल्ली शैहरा दे स्कूलें च डॉ. भीमराव अम्बेडकर हुंदे जीवन सवां प्रेरित विशेष असेंबली सत्र लोआए जांगन जिंदे नै नमीं पीढ़ी गी उन्दे विचारें ते संघर्षे बारै जानने दा मौका थहोग।

<><><><><><>

PM-Haryana

अंबेडकर जयंति दे मौके उप्पर प्रधानमंत्री नरेन्द्र मोदी होर कल हरियाणा दे हिसार जांगन जित्थें ओहू हिसार ते अयोध्या बश्कार हवाई सेवा दी शुरूआत करगंन। प्रधानमंत्री होर हिसार हवाई अड्डे पर इक नमें टर्मिनल भवन दा नीहू पत्थर रक्खगंन ते जनसभा गी बी संबोधत करगंन। प्रधानमंत्री मोदी होर यमुनानगर च विकास परियोजनाएं दा उद्घाटन ते शिलान्यास करगंन। मोदी होर उत्थें आए दे जनसमुदाय गी संबोधत बी करगंन। प्रधानमंत्री होर यमुनानगर च 800 मेगावाट दी छमता आले दीनबधु छोटू राम थर्मल बिजली सयंत्र दा नीहू पत्थर बी रक्खगंन। श्री मोदी होर यमुनानगर दे मुकरबपुर च कंप्रेस्ड बायोगैस प्लांट दा नीहू पत्थर बी रक्खगंन। प्रधानमंत्री होर भारतमाला परियोजना दे तैहत 14.4 किलोमीटर लम्मी रेवाड़ी बाईपास परियोजना दा बी उद्घाटन करगंन। इस परियोजना दी लागत 1 ज्हार 70 करोड़ रपे ऐ।

<><><><><><>

Baisakhi

उत्तर भारत दे कई होरनें हिस्सें समेत जम्मू-कश्मीर च बी अज्ज बसोए दा ध्यार पूरे जोश ते भाईचारे दे कन्नै मनाया जा'रदा ऐ। फसलें दी बाड़ी दा प्रतीक बसोए दा एहू ध्यार सिक्ख समुदाय दे लोकें लेई खास महत्व ऐ कीजे सिक्खें दे 10में गुरू, श्री गुरू गोबिंद सिंह जी होरें अज्जै दे ध्याड़े सन् 16 सौ 99 च खालसा पंथ दी स्थापना कीती ही। लेफ्टिनेंट गवर्नर मनोज सिन्हा ते मुख्मन्त्री ओमर अब्दुल्ला होरें इस पवित्तर मौके उप्पर लोकें गी ममारखां दित्तिआं न। जम्मू नगर निगम आसेआ जम्मू स्मार्ट सिटी ते सैलसफा निदेशालय दे सैह्योग कन्नै नमें विकसित कीते गेदे सूर्यपुत्री तवी रीवरफ्रंट पर अज्ज बसोए दा ध्यार मनाया जा'रदा ऐ। इस कार्यक्रम तैहत रिवायती कुश्ती मुकाबला ते सूर्यपुत्री तवी घाट पर बशेश आरती दा आयोजन बी शामिल ऐ।

<><><><><><>

Udh. Baisakhi Mela

जम्मू-कश्मीर दे उधमपुर जिले च पवित्र देविका नदी दे कंडे पर अज्ज त्रै ध्याडें दा ऐतिहासिक देविका बसाखी मेला शुरू होआ। उधमपुर दिएं डिप्टी कमिशनर सलोनी राय होरें डी.डी.सी अध्यक्ष लाल चंद, उधमपुर वेस्ट थमां विधायक पवन कुमार गुप्ता ते जिले दे होरनें अधिकारिणं दी मौजूदगी च इस मेले दा औपचारिक तौरा पर उद्घाटन कीता। आम लोकें गी महत्वपूर्ण जानकारीयां उपलब्ध करवाने दे मकसद कन्नै बक्ख-बक्ख मैहकमें आसेआ मेले च स्टाल लाए गेदे न। इस मौके पर देविका नदी दे आले-दोआले रूख-बूहटे लाने दा अभियान बी चलाया गेआ।

<><><><><><>

Poonch-Baisakhi

जम्मू-कश्मीर दे होरनें हिस्सें आहला लेखा बन्ने आहले जिले पुच्छ च बी अज्ज बसोए दा ध्यार बड़ी धूम-धाम कन्नै मनाया गेआ। इस मौके पर खरी मती गिनतरी च लोकें संतपुरा डेरा नंगाली साहब जाइयै मत्था टेकेआ। महंत मंजीत सिंह होरें लोकें गी खालसा पंथ दी 326मीं बरे गंड दियां ममारखां दित्तियां। तोआई, रियासी ते साम्बा जिलें च बी बसोए दा ध्यार धार्मिक श्रद्धा ते जोश कन्नै मनाया गेआ। 30 जहार शा मते श्रद्धालुणं रियासी जिले च स्थित ऐतिहासिक डेरा बाबा बंदा बहादुर हुंदी थाहर पर जाइयै उत्थे मत्था टेकेआ।

<><><><><><>

Prez. UP PM Jallianwala Bagh

राष्ट्रपति द्रौपदी मुर्मू, उपराष्ट्रपति जगदीप धनखड़ ते प्रधानमंत्री नरेंद्र मोदी होरें अज्ज जलियांवाला बाग दे शहीदें गी श्रद्धांजलि भेंट कीती ऐ। इक सोशल मीडिया पोस्ट च राष्ट्रपति मुर्मू होरें आखेआ जे 1919 च इस दिन शहीदें आसेआ दित्ते गेदे बलिदान गी म्हेशां चेत्ता कीता जाग कीजे उनें मुल्खै दी आजादी दी लड़ाई च अदम्य साहस दस्सेआ हा। उपराष्ट्रपति होरें आखेआ जे जलियांवाला बाग च

साहडे शहीदें दा बलिदान स्वतंत्रता संग्राम च इक महत्वपूर्ण ध्याय ऐ। इस्सै चाल्ली प्रधानमंत्री मोदी होरें गी आखेआ जे जलियांवाला बाग हत्याकांड स्हाडे मुल्खै दे इतिहास दा इक काला ध्याय ऐ। उनें आखेआ जे औने आहली पीढ़ियां साहडे शहीदें दे इस बलिदान गी म्हेशां चेत्ता रक्खंगन। इस दिन 1919 च ज्हारां बदे निर्दोश लोकें गी जलियांवाला बाग च ब्रिटिश अधिकारी जनरल डायर होरें गोलियां मारियै हत्या करी दिती ही।

<><><><><><>

Punjab-RDX

पंजाब दे फिरोजपुर च राज्य पुलिस दी खुफिया ब्रांच नै डेढ किलोग्राम कोला मता आर.डी.एक्स विस्फोटक कन्नै 2 लोकें गी गिरफ्तार करी लैता ऐ। स्हाडे जालंधर आहले संवाददाता नै जानकारी दिती ऐ जे राज्य च 16 ग्रेनेड हमलें ते अज्ज आर.डी.एक्स दा बरामद होना इक चिंता आहली गल्ल ऐ। पिछले 7एं महीनें च राज्य दे दे केई पुलिस थाने पर ग्रेनेड हमले होए न। पंजाब पुलिस दे प्रमुख गौरव यादव होरें दस्सेआ ऐ जे आरडीएक्स कन्नै 2 जनें गी गिरफ्तार करियै समाज दुश्मन ताकतें दे इक गरोह दा भांडाफोडत्र कीता गेआ ऐ ते गिरफ्तार 2 जनें कोला जानकारी हासल होई सकोग।

<><><><><><>

Army-Recovery

किश्तवाड़ जिले दे जांगली इलाके छात्तरू च जारी आतंकरोधी अभियान दौरान टाकरे आहली थाहरै थमां सुरक्षाबलें, हथियार गोला-बरूद ते बिस्फोटक समेयान बरामद कीता ऐ जेदे च 1 ए.के रफल, 1 एम-4 रफल, 40 रौंद ते वायरलेस सेट शामिल न। 9 अप्रैल थमां शुरू होए दे इस टाकरे च सुरक्षाबलें अज्ज तोड़ी 3 आतंकवादियें गी मारी मकाये दा ऐ। तोआई, जंदे रोज चिरे राती इलाके थमां दपक्खी गोलीबारी दी बी खबर ऐ ते मन्नेआ जा'रदा ऐ, इलाके च अजे बी किश आतंकवादियें छप्पे दे होई सकदे न।

WB-Violence

पच्छिम बंगाल दे मुर्शीदाबाद जिले च होई दी हिंसा दे मद्देनजर केन्द्री गृह सचिव गोविंद मोहन होरें राज्य दे मुख्ख सचिव ते डीजीपी हुंदे कन्नै वीडियो कांफ्रेंस राहें बैठक लाई। इस मौके पर पच्छिम बंगाल दे डीजीपी होरें उ'नेंगी दस्सेआ जे हालात तनोतनी आहले पर काबू च न ते हालात उप्पर लगातार नेड़मी तक्क रक्खी जा'रदी ऐ। उ'नें इब्बी गलाया जे हिंसा दे मामले च 150 लोकें गी गिरफ्तार कीता गेदा ऐ ते पच्छिम बंगाल पुलिस आसेआ मुकामी सतह उप्पर तैनात बीएसएफ दी सहायता बी लैती जा'रदी ऐ। तोआई गृह सचिव होरें गलाया जे राज्य सरकार दी गुजारिश पर बीएसएफ दिएं होर बाददू 5 कंपनिएं गी पच्छिम बंगाल च तैनात कीता गेआ ऐ। उ'नें राज्य प्रशासन गी सलाहू दित्ती जे ओहू होरनें संवेदनशील जिलें च बी हालात उप्पर नेड़मी तक्क रक्खन ते तौले शा तौले हालात सामान्य बनाने लेई लोड़चदे उपाऽ जकीनी बनान। गृह सचिव होरें इब्बी आखेआ जे केन्द्र सरकार बी हालात उप्पर लगातार तक्क रक्खा'रदी ऐ। उ'नें राज्य सरकार गी हर मुमकन मदाद दा जकीन दोआया ऐ।

Myama-Earthquake

मध्य मयांमां च अज्ज बडुलै भूंचाल दे झटके मसूस कीते गे जिंदी तेजी 5 इशारिया 5 नापी गेई ऐ। मौसम ते जिला विज्ञान विभाग मूजब भूंचाल दे केंद्र जिमी कोला 20 किलोमीटर हेठ मांडले इलाके च वुंडविन शैहर कोला कोई साड्डे 14 किलोमीटर उत्तर पूर्व च दस्सेआ गेआ ऐ। एहदे शा पैहले शुक्रवार बडुलै बी उत्थे 5 इशारिया 0 तेजी दा भूंचाल आया ह। 28 मार्च गी म्यामां च आए दे 7 इशारिया 7 तेजी आहले भूंचाल दे बाद कोला लेइयै कल्लै तगर म्यामां ते एहदे आहले दोआले दे इलाकें च 468

बारी हल्के ते जोरदार झटके मसूस कीते जाई चुके ना। 28 मार्च आहले भूंचाल च उत्थे 3 ज्वार 689 लोकें द मौत होई गेई ही ते 5 ज्वार कोला मते लोक घायल होई गे हे। उस भूंचाल दे 17 दिन बीती जाने दे बावजूद अजे तोड़ी 139 लोकें दा कोई अता-पता नेई ऐ।

<><><><><><>

IPL

आई.पी.एल दे पेहले मैच च रायल चैलेंजर्स बेंगलुरू नै राजस्थान रायल्स गी 9 विकेटें कन्नै हराई दित्ता ऐ। जयपुर दे सवाई मानसिंह स्टेडियम च इस सीजन दे 28में लीग मैच च राजस्थान रायल्स नै पैहले बल्लेबाजी करदे होई 20एं ओवरें च 173 रन्ज बनाए। परते च बेंगलुरू दी टीम नै 17 ओवर ते 3 गेंदें च शड़ी इक विकेट मोहाइयै 175 रन्ज बनाए ते मैच जित्ती लैता। दुआ मैच हुनै कोला किश चिर मगरा दिल्ली कैपिटल्स ते मुम्बई इंडियन्स बश्कार खेड्डेआ जाग।

<><><><><><>